

鑑

止

水

齋

集

鑑止水齋集卷十八

德清許宗彥

碑 墓表 墓誌銘

台州東湖新建龍王廟碑

代

今上御極之六年冬特昇額奉 命知台州府事次年夏浙東苦旱自四月至六月不雨苗植于田者焦且稿巡撫使者日祈雨于吳山守郡官各就所治爲壇以請昇額率屬齋肅步禱于六月初五日始越七日雨弗降赫日如赭天無片雲民情滋懼十二日時加未臨海之前所有龍見海中雲氣扶之徐徐上頭角鱗鬣宛然可覩海濱居人羣聚指視兒童或驚且

譁龍遂奮勢起風大作雷電繼之雨如注郡所屬境
同時霑徧繼是日有小雨苗之焦者潤稿者興比秋
收獲無所歉鄰郡亦以次得雨然較遲有歉入者惟
台地濱海環山俗凋劫每歲催科常絀額支港曲折
通大洋逋逃之藪不能無莠民歲一不登奸偽叢起
以昇額之德薄才淺其將何以治此今荷龍神之靈
沛然獨早野有藏蓋四境謐寧此皆

聖天子勤民盛德無遠弗届有以昭假于大神非昇
額區區所感應也於是吏民相與請曰神之佑吾郡
者彰顯如是吾儕獲享其利敢勿思所以報昔槽馮

二龍致雨南宋時立祠以祭郡之故實也昇額按郡
向有龍神廟在後山久不葺地僻于禱祀弗便東門
外東湖地爽塏有山水之美宜于建祠因捐俸爲倡
俾六縣一衛之長各輸貲助郡民踴躍趨工不數月
落成廟貌聿新榮宇整飭齋庖之房咸備于以祀龍
神爲郡民仰酬靈貺而凡風雲雷雨之司力足庇吾
民者亦咸在自今伊始和甘以時螟螣不作吾民其
益敦孝弟務力田爲 聖世良民以默邀神鑒歲獲
順成之福守土者何幸如之爰刊石爲記而系以迎
神送神之歌詞曰

靈惋惋雲滃與般常羊登天門神之徠歌且舞澤下
尺年若土布蘭旨兮勺藥芬願須臾兮微感心湖玉
液兮峯翠屏神將歸風泠泠麥禾扶疏嘉穀成吾民
報祀兮匪今斯今

湖州府歸安縣後林村新修白龍橋碑

茗水枝分逕郡東常樂鄉爲白龍港折而南入運河
是納諸山之水與太湖諸瀆相灌注環港村落十數
至郡治或赴旁郡必涉港而東西焉村之大者曰後
林地故有橋建于康熙五十三年當來往孔道規制
素壯遇盛夏淫潦山水四至濳濤騰激石弗能支垠

堦輒齧陷乾隆十七年嘗修之迨今復五十餘年橋
日圯半墮于水行者弗便也里父老相與謀釀財鳩
工植大木以爲厯巨石爲擎蓋擇能者董其役經始
嘉慶某年某月畢工某年某月閱歲三用錢二千餘
緡視舊制高廣過之復加欄楯爲觀美宛宛隆隆翼
如砥如可以支久遠於是里之人樂其成功而請予
文爲之記方橋事之始輸助不出一鄉鄉又無大力
者主之頭會口率其事甚煩而木石之費頗益廣衆
皆疑其無成而不謂其成之速且善也夫事莫不敗
于計較難易趑趄不前之念有能奮焉以爲無難而

又幸無撓沮之者則事亦竟就及其就也捐一時之
力謀百年之利又孰不以爲宜然乎一村之事且然
推之邦國天下之大其有不然者乎夫可與樂終難
與慮始人之常情也亦在乎任事者識力所至不爲
所搖惑耳矣橋長若干丈高視長幾之一廣幾之一
董其事者某某輪助者若而人備志之石庶將來者
有所考且以爲後事之師也

長興萬壽庵碑

去長興縣治北十六里村曰吳家灣橋曰履新橋之
陰水四環小徑通出入地幽異學道者慕焉當國

初順治間有萬緣禪師結茅於此康熙三十四年有
慧緣聖傳兩師始建殿宇置常住產於是有萬壽庵
之稱嗣法者一世曰圓明二世曰靜鑒三世曰宏珍
體珍四世曰襟南今庵主重涵則五世也庵旣近水
址甚庫牆瑩以土乾隆六年爲水所圯靜鑒實重修
之又建月照堂棲禪侶增產供壺粥重涵受具于雲
林參學于金山至乾隆五十五年襟南示宋涵乃歸
主庵事距靜鑒修庵已五十載殿日傾陔堂亦朽蠹
涵誓志營造曉夜汲汲土其基以高甃其垣以堅殿
之前爲山門後爲經樓習靜之室庖馩之所列左右

自乾隆五十七年夏至嘉慶七年冬十一改歲而後落成不假手於人不求募於外一木一石皆出僧力昔雲棲大師不許僧抄化且舉一僧以施主齋僧錢作殿柱遂遭冥譴爲警戒蓋修行人不昧因果固不當藉他人力爲自福且化人者樂其多不能無貪心是爲自作業也化者便于少不能無吝心是爲他作業也其于佛法何所取焉今涵之爲此節衣縮食歷歲甚久銖積寸累而成之其能以淨財造白業矣乎余未識涵涵欲後之人知構造之不易棲止旣適宜勤學佛法以報佛恩爰介郡人丁世楠使其姪傳經

以本末告而求余文爲記余嘉涵之意因撫其畧著
之碑銘曰

說禪浩浩不如栽田田有餘糧易木與甌長城之北
化宇斯啟聚沙維勤礪石用比經像孔安學徒羣居
連牀交脚以參以稽治平大雄祥符澄心壯麗自昔
榛蕪於今創始固艱守亦匪易尺板寸瓦勿輕而棄
挾簿奔走住相乞施瞞因乾沒是爲貪癡斯庵之建
五世一軌我銘示後毋替厥舊

太子少保前江南河道總督徐公神道碑

國家治化洪邕淪洽宙合有熾介嬈於民者必拒刷

而蕩滌之惟大河自塞外走數千里經兗豫挾淮泗入海往往漲溢壞堤岸爭運道

天子尤軫念焉常擇大臣有文武才用者任其事以故河督多名臣若靳文襄公輔納喇勤恪公齊蘇勒高文定公斌並著績當時垂聲來世而文襄文定皆嘗以河獲譴沒身論定終不以過掩其功

今上皇帝御極之八年秋河決衡家樓全溜東注奪北清河故道入海次年春決口未塞時徐州道徐公方以憂歸里

上念練習河事者莫如公

詔 公復任旋 賜三品頂戴擢爲東河河道總督
其冬復 賜二品頂戴調江南十五年冬以三壩漫
水罷公次年 賜通判當候補東河復奉
命挑李家樓引河公已被病力疾往十七年春工竣
而公卽卒於是夏公以寒峻受

聖主非常之遇任河督者七年以河患棘不遑離局
終不得一覲

天子悉陳所欲言河務與地方漕運相關穿必會議
乃行所規畫固有不能盡如公意者惟

天子深知公才優守潔將復大用而公已不及待矣

惜哉公諱端字肇之浙江德清人曾祖諱元臣諸生
祖諱志丙以賢良方正仕至岷州知州父振甲涉縣
知縣候補同知皆以公貴遇 覃恩贈如其官公黜
色長身舉動豐偉望若武人尤彊力勤恁涉縣君始
官江南清河公從之暇輒行堤上遇老兵退吏訪以
河事周委其利弊涉縣君分挑青龍岡引河公佐其
役章佳文成公見而器之 奏補東河通判乾隆四
十九年補蘭儀蘭儀改同知卽擢公爲之其後睢寧
亦改同知復調公睢寧又調下南河六十年署開歸
道事隨總河率兵至湖北界防禦教匪以勞 賜戴

花翎兵旣罷公復署兗沂曹濟道嘉慶四年引見
以知府擢用旋授饒州府知府東河督奏畱公山東
已奉

俞允而江南督南總河復合辭奏請調公淮安以築
邵工竣加道銜七年升署徐州道八年秋丁涉縣君
憂

特詔公治喪百日仍之任未及期驟起復公嘉慶十
一年復舊制設江南正副總河公任正者一副者再
加太子少保十五年裁副總河而公復爲江南河道
總督公仕宦未嘗一日去兩河於挑濬廂攬機要鉞

縷穿貫葦柳四積隄上公一過測其多少莫能欺在
工不避風雨盛寒暑與夫役同勞苦數十年間凡遇
大工輒倚公以辦兢兢自愛不妄取一錢而于故舊
惠恤周至未嘗以廉裁物前後當賠官帑二十餘萬
金遺命以財產悉納之官公之任南河也上流旣塞
入海味暢險工叢立內外論者莫不推公之能矯首
傾耳俟公奏績而公百方措拄心力交瘁用帑三千
餘萬計屢得無大害有議改海口者公堅持挑倪家
灘淺修治故道後卒用公議今大河入海甚暢頻年
無事公之功至是乃見譬搏猛獸者方與之角戟手

跣足猶若不敵或不能無所傷及其力之既殫則制之甚易勞于前而逸于既其勢然也公之沒也姚郎中鼎爲志銘然實未有墓地嘉慶二十二年十一月公子鏞鏗將奉公及公配蔡夫人葬于錢唐之青龍山麓而乞墓道之文於宗彥公於宗彥爲中表丈人公起復時過宗彥縱譚乃去宗彥竊觀公之爲人愴慷俊邁敢任事丈夫也丈夫生有益於時死有聞於後斯已矣名位得失固不足爲公重輕焉公壽六十一生卒年月具姚志所著有安瀾紀要迴瀾紀要二書系以銘曰

有汨者流流駛軌有劔者隄隄互阡往者之功來者
埃雲車兮風馬從河伯兮來下筇魚龍兮扶蛟鼉壤
無反兮恬洪波功旣遂兮其榮多體魄僚寂兮長偃
息于茲阿

重修南唐處士克進劉公墓表

劉生椿謁余曰椿之族遷歛之敬興村蓋自南唐時
遠祖處士君始遠祖事行猶可考諸載籍歷年旣久
墓湮廢祭掃禮闕椿之伯父智四求而得之清兆域
加封樹焉意欲世世子孫毋忘其始使椿以刊石之
文請余按處士名與字克進曾祖以上仕唐僖昭間

爲郡佐者一爲節鎮者二唐書明一統志及宋王昭
素所撰劉氏宗祠記詳之矣處士幼倜儻有奇節自
以唐室舊臣後不樂仕異代愛歛之山川由婺遷居
聚族野處號其村曰敬興比之司空圖王官各以避
亂而娛志長養其子孫司土者表曰雲居里其後族
日繁皆承處士之教務孝弟力田淡于自進自南宋
以前村中無二姓千餘年來或值喪亂旁郡之寇入
其地者屢矣而能固結自保不罹兵患 國朝康熙
初耿精忠叛于閩遣僞將自饒寇歛旁掠村墅賊數
百趨敬興劉氏族出奇計盡殲其衆以故他村墅

多被害而敬興獨否豈非處士之貽謀者遠哉處士之墓在劉氏固宜歲時修敬永久勿替而是村爲處士所締造村之人食其德于奕禩禁樵採剪松柏必恭敬止禮也劉生與予遊其述祖德甚詳余之文何足爲處士重書其實而不敢有傳會揭于阡以示劉之族人其或以爲可也

福州陳氏祭酒嶺墓表

嘉慶十五年冬翰林院編修福州陳君自都奉先大夫諱奔喪旋閩道出錢唐以祖父事狀謁宗彥乞表墓之文且言曰壽祺祖妣前卒實葬侯官祭酒嶺之

原吾祖所自營也先大夫既合葬吾祖今壽祺將筮吉以昭穆祔葬先大夫表宜爲一通樹之便宗彥於編修同舉進士稔其文章行誼所自敬諾不敢辭按狀贈奉直公名起龍字武桓一字雲田閩縣學諸生先世自泉州惠安後坑鄉遷晉江後市鄉再遷郡城至文侯君始家福州是生植園君文侯君名式璜植園君名應瑞生子三贈公其長也少貧當廢儒業者屢矣卒不改終其身處約彌邃於儒子孫皆親教之不名他師制行醇直老稚咸信之卒時年八十一如植園君之年嘉慶九年甲子十一月某日也配會宜

人勤婦職善事其姑生子一卽封奉直公封公名鶴
書字錫三一字東麓少穎敏郡邑試必高等時相繼
視閩學者皆名臣莫不重其品學亟稱之早食餼顧
不得意于省試久次爲歲貢生歷主書院講席教授
弟子成名者甚衆爲人恂恂然忠信自守善爲詩冲
雅如其人嘉慶十五年庚午七月某日卒於上杭講
舍年六十有五配郭宜人生子三壽祺壽愷壽富壽
祺嘉慶己未科進士翰林院編修充 文淵閣校理
國史館總纂壽富縣學諸生孫四人兩世皆以編修
貴累遇 覃恩贈封如其官陳氏上世務農事贈公

始耕且讀爲學甚苦封公繼之志尤篤至編修而乃克有聞編修旣仕于朝燕閩相去半萬里俸入薄不足以迎養封公雖老猶頻年于外挾冊講授謀事育之資贈公卒後六年而封公亦沒編修創鉅痛深實抱無窮之憾而深悔其入仕之非其所述至不可卒讀嗚呼以累世讀書之困而幸而有成復不能享其榮利則夫勉子弟于學以求聞達者其果不盡然耶夫爲人祖父其所望于後者固樂其能伸己志一洩幽滯拂鬱之懷豈樂其朝夕之在側哉人子盡其養志之孝于已而有所不可致者天也夫編修起海

嶠入詞苑以經義辭章傾一時爲

上所知遇凡贈公封公之學術亦旣闡而明之俾咸知有閩陳氏之學鄉之父老莫不太息謂陳氏祖父誠善教其子孫然則兩公雖未昌其身而名之昌固已至矣況乎編修他日陳力于國家布惠於氓庶皆將於家訓乎取之吾知先靈之所慰者更大爾贈公葬於某年月日封公葬於某年月日是爲表

山東館陶縣知縣汪君墓誌銘

君諱立本字其淵蔗田其別號也汪氏自唐越國公華盛于新安其後族繁衍分處

國朝康熙年間君高祖士可自揚徙杭占籍錢唐君之考質有令德善治生君席華廡受性淳懿幼勤讀聲色徵逐概弗與屢進愈篤昌其文年二十三爲諸生學使者東臯竇先生制藝名海內閱君文歎賞拔高等補廩膳生乾隆二十二年

高廟省方召試江以南士能詞章者君列二等第一受大緞荷囊之 賜聲華斐然至辛卯科舉鄉薦年已四十餘計偕至都都下卿大夫賢士耳熟君名多捧手論交旣丁外艱舊業日隳落君與伯兄叶力措挂之四十六年試禮部遇大挑以知縣分發山東屢

攝定陶淄川清平縣事各有名績補館陶縣以公事
絀誤去官君既有雅望在山東分按鄉試號得士治
民彬彬然質有其文在職民敬之去則思之君未仕
前一年君之子人憲舉鄉試第一旋仕于

朝君伯兄復沒故君罷官後不復出學所未及展者
以授其子而身行之于家志存利物往往舍己事狗
人賢者急病讓夷君其有焉命不副才文可以爲國
華而疲於上上惠可以及氓生而已於三仕鄉黨惜
之君生于雍正十年十二月初八日卒于乾隆五十
八年七月初二日年六十有二

敕授文林郎山

東館陶縣知縣以子人憲貴

誥贈奉政大夫戶

部山西司員外郎元配氏陳繼配氏姚氏宋皆封宜人子三人瑞雲南南安州通判人憲戶部山西司員外郎人顯孫六人嘉慶某年月日葬公于某山某原三宜人祔焉銘曰

璞玉理兮可貢廟廷縑籍遴之遂閱其貞高原腴腴護此佳城所不沒者爲善之名

浙江道監察御史許公墓誌銘

許氏郡望有六同出于姜姓支派旣別譜系學亡莫能攷其遠近乾隆中先大夫與侍御史穆堂先生同

朝相得因敦昆弟之誼子弟來往咸如近屬先生以疾早引退嘉慶八年卒于家逾一年將葬嗣孫元崇等來乞刊石之文宗彥方執先大夫喪辭不獲已痛念往昔謹序而銘之公諱寶善字敦虞別字穆堂系出唐睢陽太守遠宋時自大梁遷江南青浦祖純文考雲鵬積德不耀封贈如公官公中乾隆丙子科江南舉人庚辰畢沅榜二甲進士授戶部陝西司主事擢貴州司員外郎福建司郎中乾隆四十年擢浙江道監察御史尋掌道事公在臺以峻風檢肅班行爲已職不屑屑求建白名甲午丁酉兩充順天鄉試同

考官自以出寒素校閱尤盡心號爲得士四十五年
夏墜車傷足遂乞假歸自號硜硜子歷主鯤池玉山
敬業三書院講席教學者多有成就公早歲以詞章
鳴客莊親王邸名流引重晚年學愈進所著詩集凡
二十卷詞七卷樂府五卷詞譜六卷杜詩注釋二十
四卷行於世又有文集詩外集詞續集若干卷實事
錄二卷藏于家蓋少而誦讀壯而論議老而教誨唯
公可無忝焉年七十有三生雍正九年十二月十四
日卒嘉慶八年十二月二十八日配孫恭人惠心善
容協于德象先卒生長子蔭培女三繼室吳恭人賢

而有法亦先卒生次子蔭堂女二籙室文孺人生第
三子蔭基女一又撫女一蔭培乾隆己酉科舉人先
公卒蔭堂蔭基邑庠生女並嫁士人孫四人元崇蔭
培子邑庠生蔭培爲徐編修天柱壻僑居德清其婦
卒先大夫爲小傳今宗彥乃爲公作誌可悲己銘曰
崑山縣兵墟村辛亥冬穿幽門先葬者元配孫虛厥
中生壙存耐于右吳恭人歲在丑筮告貞歸于同室
蕃其後昆

廣西思恩府知府葉君墓誌銘

君諱藩字登南一字古渠浙江仁和人祖諱文奎考

諱陞皆贈朝議大夫祖妣鄺妣單生妣戴皆贈恭人
君于昆弟居六幼侍母疾足不出戶年十六入庠旋
試高等補府學生中乾隆十五年庚午科舉人次年
辛未科成進士改庶吉士習清書十七年散館授知
縣選廣西永福以親老謁近十八年選江南建昌始
請假歸里取室其後遭喪服闋別授陝西同官調蒲
城所至有善政於治獄尤不苟必反覆初供期于得
實三十七年大計卓異三十九年擢廣西太平府同
知定顧夫法民便之四十一年擢廣東廉州府知府
旋調廣西思恩土司有桀黠者斥不見威嚴憚君會

歲饑民多鬻子給直養之官比歲稔歸其父母明年以在同知任有失察事去官思恩人懷之爲立生祠君遂歸里息意仕進屢爲吳楚間書院山長教誨不勌多所成就君爲人內自重肫肫然不事名昆弟老而友愛撫諸孤姪恩誼甚至交友終始若一嘉慶十一年九月初五日卒年八十三年附葬半山祖塋士人所稱葉家山也配恭人吳氏慈惠以恭能佐君德後君十二年而卒年八十有三從君之附子三之本早卒之朗仁和縣學附生之田候補縣學訓導女一適刑部主事仁和趙溶銘曰

儒術之修兮從政之良明清于單辭兮惟初之詳自
邑及郡兮從容有常禁暴慈幼兮惠流嶺方仁心入
人兮生而烝嘗未竟厥施兮中歲歸鄉扶翼性學兮
講求誠正匪襮是飾兮素履之貞闔門邕睦兮是亦
爲政友天下之善兮久而能敬闇然日章兮後進是
型銘茲幽藏兮遠垂厥聲

浙江杭嘉湖兵備道李公墓志銘

嘉慶十九年五月二十四日杭嘉湖兵備道李公卒
於位九月公子太守君奉公喪歸葬于蜀而以狀乞
薶幽之文于宗彥宗彥嘗一見公顏色凝然以寬聆

其言簡而中于事惠溫君子也按狀公諱坦字字泰一字平山先世自楚麻城縣遷蜀明末避兵于黔

國初復還蜀家於重慶長壽縣磨盤山側曾祖諱瓚歲貢生五子三中甲乙科雍正壬子科副貢歷官西充縣訓導安徽積溪懷遠兩縣知縣諱鹽梅者公之祖也乾隆己卯科舉人歷官山東章邱臨邑兩縣知縣諱汝堂者公之考也公以川運例知縣乾隆四十四年試用浙江補富陽縣調烏程擢東海防同知台州府知府丁父艱服闋授寧波府知府調杭州丁母艱起復選山東青州府旋調河南陳州復調開封再

攝道篆屢治劇案無枉濫豫人感之嘉慶十五年擢授浙江杭嘉湖道公仕宦三十六年唯在豫者三載自知縣至監司攝運使事者一臬司事者五在浙尤練於浙之故若海塘工程歲漕事中失利弊瞭于目貫於心不假案牘墨戾吏無敢以曲故嘗

高廟南巡公供擬宿辦疊蒙 賞賚任海防時築魚鱗石塘六千餘丈物堅工完潮汐不爲患嘉慶九年久雨穀翔貴公請大吏賚庫銀三十萬入蜀次年運米回市價乃平獎率紳士建普濟堂鰥寡賴之得所川楚教匪未靖時公方在籍邑依山無城郭賊卒至

焚公之居公率族中子弟躬執矛矢禦賊會官兵亦
至賊遂潰創議捐貲卽舊址築城事

上聞加軍功一級凡公之在鄉居官利及于人多矣
不悉書書其尤者公生乾隆十六年十一月初四日
年六十有四元配呂恭人繼配劉恭人先公卒繼配
劉恭人筮室喻孺人子三長蕃直隸候補知府前劉
恭人出次莊廣東候補知縣後劉恭人出次莖喻孺
人出女子子五呂恭人出者二前劉恭人出者一後
劉恭人喻孺人出者三銘曰

生岷江官南江江水孔仁今我德信砥勇于義兮衛

其鄉達於從政兮無用不臧寬以讞獄兮所積者長
歸於厚宅兮後嗣之昌

刑部直隸司員外郎順天府治中許君墓志銘

嘉慶二十一年七月刑部員外郎族兄芋園君以五
世一堂旌於朝先是君繼妣馬恭人嘗以是受旌
洎君復如之時君已有疾越一月而卒聞者莫不太
息以君及見元孫爲備福君諸子並以宦學有聞於
時孫曾十數人胖胖兢兢則君之遺澤其未有涯也
君得天純固善事其親親任廣東揭陽令君從在署
親以事入省邑中少年聚黨拒營弁捕勢洵洵君密

選吏卒禽其爲倡者黨與驚散所保全甚衆奉馬恭
人假繼不間有姊早卒聳依君居五十餘年長其子
孫御家和以嚴口無譁言身無譁好諸子在數千里
外動靜必聞家事亦各報使知常若在一室然於戚
舊寒暑若一拯困厄唯恐不濟以故仍世爲令牧未
嘗有恒產尤樂成人之美有坊者夫婦並亡子十餘
齡好讀書叔以廢業困苦之君聞召使竟學遂入縣
學爲諸生君之從政也明練治術長於卹人以乾隆
壬辰科進士援川運例選雲南雲龍州知州州有巫
能預言休咎君械之示衆曰妄人耳寧足惑耶鹽井

六竈戶煮恒不及額民計口輸鹽課有亡者君爲均
劑得其宜咸以不困丁外艱起復選貴州黔西州知
州再充鄉試分校官能盡其人才銅仁苗叛大兵討
之巡撫檄君總軍需局君倉卒區畫糧料咸辦兼攝
大定府事旋擢順天府治中以善聽訟屢獻要獄步
軍營獲竊南宛麀鹿犯十餘人二奏交府鞠治罪且
至死君廉知鹿以淹斃漂墻外窮民無知取食比偷
竊圍場野雞無器械例牒請杖釋嘉慶六年京察
一等其冬轉刑部直隸司員外郎未引見丁內艱
歸里君旣耽鄉黨故舊之樂又以子入仕可報

國服闋後遂不復出每遇風日佳美輒置酒會故人
壺矢觴行陶然永日君舉乾隆戊子科鄉試同年生
在者有五人王大令庚期朱太守學濂陳大令光鑑
許大令基並年登老耄嘉慶十七年上巳會君所修
禊事君爲圖以紀之君諱學范字希六又字小范別
字芋園浙江錢唐人生乾隆十六年六月壬子卒嘉
慶二十一年九月丙辰享年七十有二考諱鉞乾隆
戊午科舉人仕至廣東理藩同知贈中憲大夫妣顧
繼妣馬贈封太恭人祖諱堯堂祖妣張曾祖諱戩曾
祖妣汪皆馳贈如例先世本富陽沈氏前明時名立

者育於表姑承其姓再傳名繼祚嘗佐洪文襄公墓以軍功官大理府同知者也君配戴恭人儉而慈仁能贊君之德先君七年卒筵室王孺人姚孺人王早卒子八人乃來舉人江蘇候補直隸州知州乃大舉人四川大竹縣知縣乃濟嘉慶己巳科進士翰林院編修乃成殤乃穀仁和諸生君有兄早卒乃穀奉君命爲之後乃普舉人刑部奉天司七品官戴恭人出乃恂王出乃恩姚出女三俱戴出長女壻仁和諸生張祐次女壻雲南鹽法道潘恭辰三女壻陝西華陰縣知縣汪連孫九人長敬身安徽潁上縣知縣曾孫

三人元孫一人君豫營兆青龍山麓大其窳使他日
諸子皆可耐葬嘉慶十六年葬戴恭人子婦先沒者
從之二十二年十二月乃來等奉君窆焉君性寬博
終其身未嘗戚戚與人務從其厚蓋有足以致福之
理宜其蕃衍昌熾門材輩出榮羨于時銘曰

不三載而崇不千畝而豐惟德之扈冶以蕃其生而
葉語於無窮

皇清誥授光祿大夫 太子少保工部尚書姜

公暨配 誥封一品夫人顧夫人合葬墓志

銘

公諱晟字光宇號杜蘓又號度香江蘇元和縣人以諸生中乾隆己卯順天榜副貢壬午順天舉人丙戌進士授刑部主事洊歷員外郎中太僕寺少卿江西按察使擢刑部侍郎外任湖北湖南巡撫兩湖直隸總督內擢刑部尚書調工部尚書以疾乞歸嘉慶十五年四月十六日卒於里第距生雍正八年正月五日享年八十有一按譜姜氏在元末有名義者始徙居山東萊陽縣公之五世祖瀉里明季以諸生殉難高祖採明禮科給事中言事謫宣州衛明亡偕弟垓流寓於吳所稱二姜先生者也其後遂爲吳人曾祖

諱實節祖諱本仔吳縣學生父諱震金山衛學生湖北施南府通判三代皆以公貴贈刑部侍郎公生而聰穎器宇闊達沈毅始仕刑部卽見重於諸城劉文正公毘陵錢文敏公其後受

高宗純皇帝特達之知

今皇上老成之眷前後再由曹司長貳秋官掌律令凡數十年平亭庶獄輕重莫不悉當奉命讞事直隸者九江南者三山東山西湖北雲南貴州四川皆二浙江江西河南盛京皆一疏雪冤滯四方服其公平而公亦嘗以歐陽子之文銘坐側治業牘無小大

必盡心服念中夜不寐務得其情以明以慎又嘗奉
命履勘南河濬治淤淺一充乾隆庚寅科順天鄉
試同考官一爲丁未科會試總裁官得士多至通顯
而公預以文字決之公之巡撫湖南也當乾隆六十
年黔省松桃廳苗人與湖南永綏廳苗相煽爲亂大
兵雲集攻勦連年公往來於辰州鎮筵間支應糧料
先事籌畫動合機要

特旨加總督銜 賞戴花翎洎統兵大帥相繼病逝
公身赴軍營與諸將協謀進討攻克社神堂等處賊
寨搗其巢穴大蒙 褒賚加 太子少保奏凱後公

任善後之責撫綏降苗安其反側永奠邊圉厥功懋焉初任湖北巡撫時以江水大至壞荊州隄罷官仍授刑部侍郎其總督直隸也當嘉慶六年盛夏大雨竟一月永定河漫溢公以未能宣防 廷議當重譴上寬公使効力工次復授刑部主事不一載補刑部右侍郎九年調署戶部左侍郎兼管錢法堂事其冬遂授刑部尚書 賜紫禁城騎馬蓋公感 兩朝知遇之恩誓一心力以圖報稱而

上知公在督撫中有守有爲故旋斥而旋起 恩眷不少衰焉嘉慶十一年公以老疾屢疏乞退

上不忍公遽去而又念公老不欲以劇務勞公
特調工部尚書賞假治疾其秋公復瀝情奏懇

上始允公開缺 命乾清門侍衛慶裕馳驛自熱河
回京帶同醫官診視有俟伊病痊再行賞給差使之
論比回籍後又有汝病大愈仍可來京之 論

上之惓惓於公者皆人臣難得之數非公之恪誠孚
契何以致此哉公將歸時會有失察直隸藩庫書吏
一案部議褫職奉

旨以僅止失察情節較輕俟病痊以四品京堂官補
用世猶望公復起而公堅執初請乞休以去進退裕

如寵榮兼備於 國家爲勞臣爲蓋臣生平行事當
具載 國史謹就譜所載撮其大者志之弗能詳也
銘曰

虞臯周蘇漢有于公爰在 聖朝惟公媿隆武鈐戢
暴經術擇士內外攸宜惟所任使年登旣耄歸於其
鄉沒而祀社史乘垂光嘉匹同穴土潔草香惟筮之
吉世以允昌

天目山禪源寺粟菴禪師塔銘

欽惟

世祖章皇帝金輪御世化洽人天時則玉林禪師大

暢宗風優承

宸眷賜號大覺普濟能仁一傳爲美發淳公淳傳梅
石琦公琦傳松溪壽公壽傳峻極鑑公鑑傳至師爲
大覺下第五代按師門人了超所爲狀師諱際界字
體周粟菴其別號也俗姓鄒家華亭父錫九母沈師
夙根深厚兒時游嬉每動世間無常想聞僧言見性
成佛發大信心年十二失怙恃誓持蔬食二十三至
潛陽謁梵音裕公陳出世意遂薙染受具足戒音令
叅一息不來向何處安身立命話兩載不契音呵曰
汝參黃楊木禪乎師發憤淬勵屏絕萬念兀立三晝

夜聞板聲豁然有悟趨白音音曰我說汝參黃楊木
禪果然師云和尚不可壓良爲賤音微哂自此辭音
遍參知識叢林尊宿莫不重之於天台南寺玉安法
師所受賢首宗旨西游五臺北至都門凡十二年乃
至祖山時鑑公主法席命師典藏許入室研鍊愈篤
又九年始承印可乾隆四十七年鑑公示寂文遠月
公繼攝方丈師爲監院嫌住持事繁去之杭之水陸
寺閉關焉後月公因病率寺衆詣杭敦師繼席時乾
隆五十年也師旣還山學徒四至隨機引接悲願宏
被鉗錘鍛鍊上抉千聖之祕下闢羣蒙之妄錙白飯

依數以萬計受記剞者有允嘉美公等二十三人受師賢首宗者則有普信宏苒染弟子又二十餘人師妙究文義內外學靡不綜覈所輯天目志才身語錄二卷行于世住山時每遇歲歉數千指待食于師又能以餘力修造山門法堂及天皇韋馱諸殿

御書樓大悲閣諸處募置香燈田十餘畝一峯雲外庵田二十餘畝大悲會田二十餘畝以至經幢法器莫不莊嚴整肅福緣交應百務咸舉可謂荷法之能象濟衆之資糧也已嘉慶十三年春師集大衆說最後法要至三月初四日晨起沐浴更衣書偈擲筆願

左右含笑而逝世壽七十僧夏四十有七塔于本山
朱頭陀嶺左折紫草灣道俗悲愴如失所依山靈黯
然林木無色門人奉師遺狀請銘因銘曰

天目巖巖諸祖之庭

皇風載融大覺挺生瓶拂五嬪其道克廣自門徂堂
丹白翹朗士女奔走稽首導師幢而鼓之津而筏之
維此導師證法雲地棒下婆心鑿頭祖意頂禮翠堵
覲佛舍利五色爛發彰我靈瑞應化既周歸于太虛
慧燈無盡涅槃無餘清風滿山明月在水誰寫師真
神光萬里

終

鑑止水齋集卷十九

德清許宗彥

先考方伯府君行狀

謹按家譜許氏自宋紹興時扈蹕南渡明初
名柔字叔剛者始居德清縣德清山之陽德
清山又名烏巾山號烏山許氏第六世名松
者生子五長孚遠前明南都兵部右侍郎諡
恭簡載明史儒林傳少子紹遠始居城中號
縣東許氏

曾祖煌甲 皇朝國學生贈中憲大夫馳贈
通奉大夫

祖鎮 皇朝康熙壬辰進士翰林院編修江
西南昌府知府刑部貴州司主事累贈通奉
大夫

考家駒 皇朝乾隆丁卯舉人甲戌明通西
安學教諭累贈通奉大夫妣蔡氏誥封太夫
人

浙江湖州府德清縣城北區永和鄉諱祖京
字依之一字春巖年七十四

先府君伯仲行居四生雍正十年七月二十日幼而
聰悟四歲就塾南昌府君課諸孫業見先府君讀論

語問能作破題乎曰能抱至高座使書覽而喜曰此
夙慧吾所不及年十九補府學生旋食餼明年先府
君外舅二田胡公爲山西芮城令教諭府君攜先府
君往迎娶胡夫人行石嶺上天雨道滑馬力殆過險
車仄且墮崖下輿夫號呼無計俄有老父至甚輿人
控馬退數十步左轉就平下車謝之老父忽不見乾
隆二十二年丁教諭府君憂先府君不善治生讀書
外一無所與蔡夫人持家嚴常遭督過每學使者試
必高第鄉試屢報罷三十年乙酉以選拔貢成均

廷試不用三十三年戊子鄉試領解己丑會試先府

君卷已落相國劉文定公爲總裁詳閱所定中卷至第五名詩落句叶歟字韻文定曰頌聖作疑詞不可中因起行廊序間卷箱纍纍隨取一卷讀之驚詫曰有文若是而棄之乎徧示諸總裁皆歎賞卽定元其先定元之本房謂此卷乃禮記俗謂禮記爲孤經乃言孤經不可中元文定依回久之遂置第五時錢唐胡文恪公爲同考官知狀後爲不孝言之先府君殿試以二甲進士歸班是時朝考入選者嚴本王世維等

高廟閱卷見論首云事必嚴辨其本拆名則爲嚴本

閱數卷卷首皆隱其名震怒擲卷於地悉罷不用逾數日復命大臣別選八人再引

見先府君與焉授內閣中書寓宣武門外日徒步懷蒸餅入直日稷乃出相國劉文正公謂先府君吾欲爲孫擇師無以逾君延主其家文正公退朝與先府君從容論天下事笑曰世謂我懃直君之迂乃過我四十年內閣缺侍讀先府君次當補于文襄公素不善先府君將別擬孫侍讀永清白文襄外傳許某不得侍讀衆頗不平文襄曰何爲曰無論其他入直之勤孰如許某者願公勿違衆論文襄愕然遂以先府

君擬正得擢用四十二年正月

孝聖憲皇后升遐舒于兩相國總喪務方是時國
家鴻慶縣長國卹禮久曠故事鮮知者先府君悉心
檢考語必有據兩相國倚如左右手不歸家洗沐者
累月再遇察典皆列一等五月充四川鄉試正考官
既復命

高廟垂詢甚悉旋擢雲南驛鹽道時鹽道兼驛傳後
以驛歸按察使道乃專司鹽法雲南鹽事疲壞有墮
煎墮銷墮運諸款虧帑各數萬計先府君日使吏會
計於前親巡諸井絕私販收餘鹽補絀額諸款以漸

清釐當是時李相國侍堯爲總督以威脅下先府君
持正不少屈四十五年總督婪賄事發使者侍郎和
珅來按治嚴急諸所引逮甚衆省中官自巡撫至守
令多褫職得罪獨先府君坦然無所染明年夏攝臬
篆屬縣民潘某鄰王秀才有少女其牆外張姓居之
一夕張爲人殺邏卒捕殺者從門隙窺潘見案上刀
血縷縷捕治自誣與張同姦秀才女妒而殺先府君
疑殺人當亟藏刃今置案庸非殺人者逃自門隙擲
刀潘案爲嫁禍計鞠女女言姦事情况使嫗視之猶
處子因語囚若枉者言毋畏囚慟曰囚夜寢聞隔院

有鬪者俄而寂然遂熟寐既寤即被縛實不知張死
狀考急妄言姦至郡陳冤遭掠無完膚故寧死不敢
復辨先府君察其言實遂挺之飭縣別緝殺人者郡
縣持不可會徐廉使嗣會回任意頗撓惑先府君曰
僕豈欲以此炫才案未上願君自定廉使卒如府君
言出潘於獄明年就擢按察使雲南多頂兇案有蔣
某爭博進殺人賄鄭小黑三承其事至司訊狀竟叩
首請曰囚有母在同邑蔣某負錢若干緡願及囚生
責其償死不恨先府君詰曰負幾年矣曰今年府君
曰然則殺人者乃蔣非汝也囚初不承反覆詰之乃

首服捕蔣至論如律駁案新編載唐二事亦正兇已
漏而先府君研審得之歲秋讞外省擬情實緩決或
不當干部駁先府君治秋讞無一誤擬爲天下最姚
州民王元珍劫財刀背傷事主州擬發遣先府君以
金鐵傷人駁令改擬斬候部覆刀背非刃不得以金
刃論承審官誤擬應降調先府君疏言州本不誤駁
令改擬咎專在臣有 旨嘉得體免降調四十九年
入 覲時甘肅回民滋事

高廟首問汝於路聞之否先府君奏逆回爭教起釁
由吏恇擾故至變今大臣往當自定不足煩

聖慮

高廟曰汝言良是數召見頻邀恩賜五十年擢廣東布政使總督富勒渾得罪先府君以審問漏泄供詞部議降三級

恩旨令安心供職改爲革職從寬畱任次年臺灣林爽文反總督孫文靖公銳任事馳潮州益調兵餉先府君抗言爽文么廢兵往卽捕滅願大府持重勿無故困粵民文靖見牘甚怒欲劾府君會爽文已獲而止安南國王黎維祁爲阮氏所逐敏關求救文靖謂先府君曰阮氏篡竊法在必討僕往西且以兵援黎

王復其國顧未遽 上聞願就君先借庫金十萬爲
餉先府君曰徼外不足繩以法必欲進兵當以檄徵
餉庫非某敢私公曰借不敢聞命五十五年總督協
揆富察文襄公護安南國王阮惠入朝郡邑欲侈其
事先府君不許供帳飲饌定有限數務張中國體示
外藩出粵境他省廚傳侈甚刊單傳布達 行在所
高廟以讓協揆協揆寓書先府君曰曩君所定數僕
意以爲嗇今乃知其得當是年春先府君入 覲中
道得 廷寄命於八月酌帶道府祝釐五十七年文
襄公以大將軍征廓爾喀巡撫郭公世勳兼總督公

事無鉅細一咨先府君推誠相得清靜爲治數年濱海無纖毫警五十九年以蔡夫人年高乞養歸里嘉慶元年丁蔡夫人憂先府君當官勤恁精力早衰居粵患足痺歸而益甚服闋不復仕就醫於杭謝賓客屏人事杜門兀坐者九年嘉慶十年二月二十一日卯時卒於仁和如松坊第無疾而逝嗚呼痛哉先府君貌清癯眉宇軒朗體素弱教諭府君常憂之日令服藥餌三十歲外精神始王治簿書恒廢寢食性至謹一事詳覆數四乃行尤彊記少所與共試者其文一過目至老猶能誦之少所讀書一字不忘在滇八

年不置幕僚事皆親決尚以餘力授不孝經故不孝
十歲外未嘗從師先府君飲食服御一從簡約持已
介淡於榮利爲諸生時有延爲師者輒謝之曰師以
講學今居貧不能不計所入是以師道市不樂爲也
朱學士筠疏言永樂大典多祕書可以時纂輯

高廟語劉文正公使擇儒者詳其事文正以屬先府
君先府君至翰林院閱永樂大典數十冊白文正曰
是書雖極博然多唐以後書且分隸韻字割裂散漫
不足重修當更議文正卽以先府君言 奏上其後
廣蒐天下書開四庫館時 朝廷嚮用文學校讎尤

勞者雖他官得改翰林人皆歆慕總裁列先府君名
府君固辭曰某在劉相國第若先衆人舉物情必以
爲不公爲方伯時巡撫圖公猝病總督在粵檄先府
君攝事既 奏聞

高廟以府君不早自奏接撫印爲不曉事降

旨申飭其後郭公復猝病羣僚咸謂府君宜亟取撫
篆且奏狀不者再受譴矣府君不可曰巡撫病者僕
自可以藩司印代行督撫事若遂取印巡撫病卽愈
不得不引退是爲僕逐之也寧受譴不爲先府君計
事務遠大不規目前瓊有礦封閉久商民資緣大府

請試開採先府君駁曰瓊懸海外民黎錯處礦開招
集無賴得不償失異日有事孰任其咎遂止省無船
步顧船必於佛山有謀立步網利者郡邑聽許先府
君聞之曰船步立必多徭役徭役多船直必昂重困
商旅出示禁革關說百端皆不聽先府君言學宗程
朱治經貴通大義 國朝諸前輩中尤好李文貞公
書杭先生大宗主講揚州安定書院先府君往往從學
在都與戴先生東原友善先府君初不言聲音文字
晚歲乃好說文欲更取經典承用字說文不載者研
求故訓爲一書創彙數百紙未及就所著書經述八

卷詩四卷許氏族譜二卷先府君困諸生久四子文
用功尤深前明一代制義無不讀謂正嘉文肅穆淵
邃比於雅頌隆慶後氣太洩理多偏枯非承平象爲
文近萬首著錄弟子成科名者不可勝數易簣前二
日猶爲孫輩改定塾課葢性之所好有在於是先府
君在都嘗充方略館總校一統志纂修官西域圖志
西域同文志勝朝殉節諸臣錄皆先府君一手所纂
在滇嘗攝臬篆藩篆在粵嘗攝撫篆不孝生時先府
君已三十七不孝十九歲外以禮部試往來都中不
恒在側先府君嘉言懿行不能盡曉所可述者止此

嗚呼痛哉先府君配胡夫人先四年卒子二長翼宗國學生早卒先府君命以不孝宗彥子延恩爲之後次卽不孝宗彥嘉慶己未姚文田榜進士兵部車駕司額外主事女一適山陰王思鈞嗚呼先人無美而誣之不孝不敢也有善而弗傳尤不忍也謹就苦次追憶聞見撰序爲狀伏求

當代仁人君子閱念孤斃錫之志表以備史氏之采擇

先妣胡夫人事略

嗚呼自先妣歿四年又喪我先府君府君卒年七十

四先妣年七十先府君與先妣同邑同歲生府君以
七月先妣以六月蓋長府君者四十五日以府君官
封至夫人夫人姓胡氏雍正甲辰進士直隸贊皇縣
知縣諱承昊孫女乾隆丁巳進士山西芮城祁縣知
縣諱官龍女贊皇君與先府君外王父蔡應山先生
竝以制義文雄於時故府君爲文兼得兩外家法夫
人年二十來歸先府君少多疾外姑談孺人尤愛夫
人所以調護先府君者甚力夫人事姑篤孝姑蔡去
人性卞急教諭府君早卒恒慘慘不樂待子婦愈嚴
或不當阿讓不少恕夫人輒引咎謝無幾微愠容先

府君不問家事悉夫人主之性至儉耐勤苦居官如居鄉日用物必裁節之藏有餘以待乏曰無而求之實難又曰貪生於不足防貪莫如儉一日之用必計次日一歲之用必計來歲常以是爲法最先公以廉介曰無憂家計也慎道遠不能迎蔡夫人歲時子女率觴爲壽必卻曰身不能養姑何壽爲比在粵蔡夫人就養官署夫人侍左右翊翊如畏伺顏色乃敢語小有恙夜數四起是時蔡夫人年八十夫人年六十呵譴尚如曩時旁觀蹙縮夫人怡然逶迤勸解得蔡夫人歡乃罷蓋夫人孝有至性尋常所不及也其待

人慈而有禮宗族親戚有所求必應御婢僕以恩卒
之日哭無不失聲者生子女五子燮宗女慈殤子翼
宗早卒惟適山陰王氏女敏及宗彥存夫人卒於嘉
慶六年二月初六日是年十一月葬於武康十七都
春岡嶺下王少寇蘭泉先生爲之志嘉慶十年某月
日不孝宗彥將奉先府君柩合葬且乞當世名人大
文光幽壤夫人例得備書是用追敘大略附於先府
君行狀之後嗚呼先考妣中年後惟不孝宗彥一子
教育無所不至食節其飢飽衣察其寒煖出必問遠
近交必辨邪正蓋先考妣之心有無窮之愛而宗彥

不得盡一日養長爲無父無母之人彼蒼者天曷其有極嗚呼痛哉

吳臺卿哀辭

嘉慶十一年二月四日聞友人吳君臺卿之卒余望而哭之因念平生游處與所以閱傷之者不杼之文無以自達也余之識君也在杭之雲棲君禮佛其地而余往游談竟夕議論愈上知其胸無塵穢相與定交君少于余余以弟呼君余久寓杭君本杭人而居平湖春秋上豕輒至至輒相見君敏于文性慷慨喜任事又席世胄顧功名可俯手取而同學生皆得意

去已獨連躓于鄉口雖不言其中蓋有結轡不堪者
叔侍郎君使就他途入仕不欲強之則乞爲儒官以
訓導試用非所樂也荻港章氏有所奉此君信之篤
所爲皆稟于此此言必敬聽甲子秋試君復下第彌
忽忽不自得則愈自力長齋日夕禮拜忘其體之羸
而困矣明年余居先大夫喪君以書唁言病不能來
夏四月李許齋至言君咯血狀六月錢恬齋來則曰
君受道士戒百日不語方夏暑火鬱肺遂病血余亟
貽書謂君老母在堂不當以疾遺親憂以危言動君
君荅書深然余而病乃日甚母夫人從長子官舍揚

州迎君以往而君病已不可爲矣嗚呼士負募宥之
略讀書慕古人誠思有所樹立於此世非躁進也時
運不偶當守已以俟之閱事愈多則才愈醇而名日
以遠世亦將知而進之有所絀必有所伸其勢然矣
卽終已無所用猶將斂精覃慮揆人事之紀究陰陽
之變洞古今之一致明造化之自然廓然遊乎太虛
而糝糠萬物何至蔽溺淺近希望萬有一然之獲同
于愚夫愚婦之所爲哉辱與君交而不能早察君之
情本隱之顯疏剔疑滯以開暢君之懷抱朋友之責
所負于君者多矣君詩文皆雋爽可誦不自收拾其

卒也無所傳又無子以竟其緒世之享高位厚祿大年者其學不必過于君其立心制行之厚交友之忠接物之恕皆不必如君而君乃蹇其遇天其年不有其後嗣豈造物者有意抑之以堅其嚮道之念以重其將來之福乎此則真不可知也嗚呼去古愈遠微獨儒者之道不明而二氏之學亦浸微浸衰而莫之振于是桀黠之徒拾儒墨之糟粕影附神鬼以行其說游魂爲變從而歸焉始猶一二好事者信之繼則朴實之士信焉繼則聰明之士亦信焉禍福以乩爲籠學問以乩爲師疾病以乩爲醫背陽而入陰舍昭

昭而卽冥冥其幽陰沈墨足以銷散人之精爽而君
乃由之以至于死是又深可悲已君名顯德余識君
時年二十餘其卒也三十有五君之叔子曰元凱者
與君同好先君而亡嗚呼事乂者可以鑒矣辭曰
金相玉亭兮可陳廟堂鍛健馬駿兮氣挫以傷游思
渺默兮歸于空鄉嗚呼友朋之感兮曷其能忘

祭學士梁公文

嗚呼疇昔之晨侍公笑言暫離牀下公遽千年呼公
不聞有淚如泉公之遺指不狀不碑視世上名如風
拂枝後死愴慕能已于辭洪惟本朝相業邁古光

光文莊是弼是輔靈鍾慶襲式續令緒埒略文林綢
績學府陶冶晉唐矩臬鄒魯

帝咨俊哲執記殿戶玉堂講幄袞職之階欽才佇德
衆望允諧公乃儵然一出不反輟棹中流江空歲晚
棲遲閱世垂六十年高風清節四海嗟賢嘗于燕坐
從容相語我性峭鯁不能仰俯意所不堪強而益苦
吾全吾素庶無怍懼豈曰蜚遁而薄圭組公于儒行
內外無虧嚴凝山立莫敢干私掖卑翼弱藹藹仁慈
公于五教深挾奧祕訶斥焚拜掃除文字耽詩早歲
辦香丹淵世鮮真識書名遂專自明迄今五百年

行楷之美孰與齊肩腕力萬鈞騰天潛淵馭空而行
冷如飛仙耄年入化純運自然雲停川逝秋淨春妍
公于宗彥爲大父行猶女婉婉奉我篋筐孔云之誼
爰託于杭學宦不達有瘦而狂公不我鄙飾其羽翰
曠辭類句讀而屢歎嘗有所作輒以相視或貢片言
頷之三四從公苦晚無月不面發揮古今蟬聯歌諺
千帖萬幅獨標眞鑑日稷請退意每未倦倉龍鶉首
公病痺疽法在不治醫噤而吁天風海雨護厥神鑪
公病瘍甚困恍惚見人送楹帖云萬里煙 壬秋上壽
雲開障戶一天風雨護神鑪病遂漸愈

左弧右悅小詩侑觴垂和至再百年大齊誰其能足

九齡餘三固天所篤養養私心猶恨太速陳几者鼎
倚壁者杖行坐儼如神襟焉往積疑莫咨發言罕賞
藤蘿颯然助我嘅想階草羅生盆花殊狀平生所喜
是植是長澹日虛牆寒煙舊幌院宇寂寥進退敞罔
儒林文苑公名天壤木壞峯頽吾將安仰有涕斯清
有羹用芼靈爽匪遠鑒茲悲悼

祭錢氏長姑母文

惟昨之夜歸省里宅聞姑示疾氣勢小極排闥起步
牀下伏謁鞠窮診候三至一息參之九藏深憂不吉
猶冀神清有問必荅上藥遄進微陽庶接七日不復

俄頃遂革哭助合綴縱縱卒卒嗚呼哀哉吾父之喪甫逾十月封堂虛佇脈山棲屑又失吾姑沈痛逼抑追溯前世感念曩昔吾父吾母往者所說姑之淑行略可憶識恭惟尊靈夙秉懿哲靜默寡言溫慎柔克服訓圖史習劬篋織爰擇良奧錢後是適櫛縱順儀旨蓄勤職遭家屯虞率禮罔忒鹿駕鮑車鴻辭臯室始自禾中遷居此邑提挈稚弱依倚慈德昔我大母內治毅急姑在左右善體衷臆情或不怡微解而釋吾母性孝每感姑力問安必偕如手相得吾伯早亡父宦遠出諸姑外嫁歸寧有節叔又筮仕惟姑在側

經紀內外參承朝夕上下無間終始如一童年敬聽
舊事歷歷日月不居今且四十垂十年中嬰禍慘烈
重闈悴霜怙恃胥失孤子煢煢靡露靡翼姑年最尊
庶蒙匡飭頽波不停稷景忽匿總帳風飄麻衣淚漬
嗚呼哀哉惟姑之德女師所式惟姑之福後嗣是食
子旣幹竦孫亦玉立宜享遐齡載康載色如何不弔
星運遽畢餘閣一奠長號四溢嗚呼哀哉神明盼儻
兮化爲白雲見吾父與吾母兮攜手相親繫我心之
孔悲兮闐闐高而不聞迴飈颭其卷雪兮靈惚恍而
來歎

汪龍莊先生像贊

先生少孤母夫人教育之篤願力學通古今明練吏事江以南州府爭辟致所至比于岑公孝范孟博賢士大夫多樂見先生見必嗚咽述母夫人之德以故汪氏雙節母名聞天下天下莫不以先生爲孝子能顯其親也成進士爲湖南寧遠令惠政及人當擢矣意有不合投劾去里居著書數萬言尤長于元史糾補誤脫爲元史本證教子孫有法度蓋古君子言行慥慥先生有焉先生舉鄉試與先大夫同年相知深其歸也先大夫亦歸自粵東相見武林宗彥獲與撰

杖之末數聞緒論先生下世五年瞻拜遺照敬爲贊
曰

古儒者叔孫宣郭令卿及馬鄭竝下義釋律章惟先
生施于政罔不臧著藥言示來者其澤長瞻遺貌感
先友心仿惶